

後村先生大全集

後村先生大全集卷之六十四

外制

陳韓依前觀文學士特授正奉大夫福建安撫
大使

朕歷觀先正尤重故鄉曾繇上宰之尊嘗臨青社琦
以元勛之望亦判相臺肆起耆英就額方面具官某
一代經綸之賢佐兩朝開濟之老臣出若富范之行
邊力既勞止退如馬呂之居洛卷而懷之身雖掛于
衣冠人猶問其年貌及新大化並致諸賢首馳銀信
以趣歸屢卻蒲車而堅卧虛前師後誦之地冀其一

來聞東甌南粵之民德爾再造屬帥垣之弄印卽里
第而建牙以大使而領州若高皇之待浚百年創見
十聚懽傳驚行畏包老之嚴明狙詐服宗爺之駕馭
馬騰士飽練帳下之欣飛海宿山行絕草間之暴客
坐令遠俗復覩太平朕為無媿于士民卿亦有辭于
父老噫園林之勝鐘鼓之樂幾人獲全邦家之光閭
里之榮二者孰美勉建嘉績用酬隆知可

陳韡依前觀文學士特授宣奉大夫依所乞致仕
朕惠顧全閭儀圖壽雋閱禮樂謀元帥甫就畀于中
權至將相歸故鄉遽欲尋於初服重違雅志申錫思

言具官某鍾河嶽之英傳關洛之學始若莘渭之王
佐將以有為晚如齊魯之大臣召而不至嘉其庶退
慮以便安監成憲于祖宗之朝布寬條於父母之國
僅及五月而報政不許一年之借留懇切而言閔勞
以事千兵百吏未嘗知畫錦之榮一馬二童俄復返
深衣之舊陟文階之峻品拓采地之新畬噫明哲以
保其身御素安于止足體貌而厲其節朕未替于眷
懷尚告遠猷益綏純嘏可

臨江守臣陳元桂忠義之節照映今古特轉五
官贈寶章侍制與一子京官一子選人賜錢十

萬貫助葬仍立廟賜謚正節

過家而懷印綬繡行極太守之榮扞圉而死封疆板
蕩識純臣之節方欲革臨難偷生之俗所宜褒見危
致命之人具官某昨剖郡符適罹狄患不委國而大
去寧為王而前驅元歸如生宛然先軫之面血化為
碧宸哉長叔之冤采行路無情之言知罵賊不屈之
狀奎閣候松楸之對水衡給助葬之錢錄其孤兒節
以一惠噫古有双廟祀睢陽之守城今無百身贖仲
行之臨穴諒惟英爽歆此寵光可

趙與謹西外知宗

天眷聖宋本支百世昔也聚族京師南渡於泉福建
外郎文昭武穆日大以蕃常選宗室之有德望者以
糾率之爾內為丞郎外厯麾節好謙而下士樂施而
疎財所至有琴鶴之風無珠犀之謗清修足以勵俗
長厚足以容衆使之居祭酒之任而不責考功之諫
麟趾公子必有觀而化者朕方嚴于更迭爾豈久于
滯留可

沿江制參京櫬為提督屯田歲收增額特轉一
官

言留屯之使者多矣惟充國能行於淫中亮能行于

渭上是在人而已吾視故府歲收二十萬斛者有賞
爾以議幕提綱歲收不止及額更羨五萬餘斛副閫
第勞來上其進一秩以為服勤盡瘁者之勤可

吳浞湖北提舉

朕念重湖之北遠于天而近於塞比歲驚騷清野失
耕土之瘠者今不毛矣民之貧者今靡孑遺矣孰能
為朕任咨諏勞來之責使齒骸復為人莖荼化為飴
乎爾以儒發身剛介自立其以常平使者節攬轡一
行去吏之蠹賊拯民于水火以清約變汚濁以義理
拆強暴湖外之民庶乎其稍有生意矣昔熙寧遣趙

濟淳熙遣朱熹千載而下是是非非自有公議爾宜擇于斯二者可

卓夢卿直寶章閣廣南提舶

朕監國初成憲以守兼舶而琛臺久虛非刊印也選擇而使也爾昔執簡赤墀之下談經細旃之上知朕貴德而賤貨獎廉而惡貪矣昔先臣介仕于嶺嶠郡有夷琛衆爭賤買仁宗曰唐介必不爾命取其籍閱之果然此予命爾以貼職送爾以皇華之意也否則互市豈無他人乃以煩前御史哉可

陸德輿依舊寶章學士知太平州

行林外集
吳以長江立國護數處之風寒晉於姑孰置屯壯下
流之形勢矧值脩攘之際尤難牧守之材自非近臣
曷稱隆委具官某修之賢聞于天下機之文貴於洛
中批勅瑣闥凜若銀臺之風采持衡銓部皦然水鏡
之晶明頃辭長樂之麾逕返平泉之墅朕灼知薏苡
之謗起於無根卿懷避刺相之行爲之易填屬時天
塹預講秋防凡六朝諸名勝設險守國之遺規與中
興賢將相建事立功之陳迹憑高感發望古慨慷壁
壘旌旗孰不仰臨淮之號令繭絲保郭必且減晉陽
之戶租先固羣心坐收長筭噫犢耕渤海應無帶刀

劍之人鳳集潁川行有下璽書之寵可

陳顯伯徵猷學士知建寧府

朕懷老成之舊重恬靖之風蒲輪加璧之招確然辭
巽燕寢凝香之樂處以便安陟奎閣之隆名需潛藩
之近次具官某博古通今之學吐詞為經之文久冠
橐班熟識鄭公之履嘗持文柄尤多陸氏之莊潤色
皇猷之才高調護儲闡之功大頃勇急流之退俄逢
聖化之更以周天官兼唐內相朕方渴想召賈傳而
使前卿有遐心嘆魯生之莫致念其耆艾命以尹釐
輟清都太微之廷收碧水丹山之郡實維鄰壤諒愜

雅懷噫黃霸化行瀟川毋令專美子牟心存魏闕尚
告遠猷可

曾穎茂依前集撰知隆興府兼江西運副

朕慨念江鄉簡求尹漕頗聞會府思廣平陽春之來
美及列城願子駿福星之照選於已試誰不曰然
具官某機足以語九流智足以應萬變論思禁路並
遊東馬之間彈壓神臯不在敬尊之下頃拂衣而勇
去屬解瑟而載調深惟翼軫之區適值兵戈之後蹠
血踐數州之境生聚殲焉挾粟餉萬竈之屯本根撥
矣孰可往甦于凋瘵爾嘗游擁於節麾必推揅焚拯

溺之心必體被髮纓冠之義必獲五善必寬一分使
落霞孤鶩之觀復還而木牛流馬之運不絕民有生
意軍無乏興噫常丹之政立碑難忘於遺愛魏牟之
心存闕尚告于遠猷可

沿江制參程若川為監軍應白鹿磯之急轉一
官

白鹿磯之捷與臣世忠臣允文金山采石之功相埒
爾于是時能率下流援師來會丞相謂爾征行良苦
濟助孔多朕甚壯之晉秩一等以觀趨事赴功者可

鄭協秘撰廣東運副

頃者建制聞于西廣命將調卒旗鼓相望大農窘于
供億乃竭東廣之泉粟以資助之一旦寇至制閫莫
能式遏蹀血數州東路僅僅自保而公私煩費力竭
而本撥矣朕惟已疲之馬驟之則輿駭久張之弓急
之則弦絕思得忠實體國老成練事者往將陞指而
命爾協馬陟使名加美職而歌皇華之詩以送之昔
河東之民目鮮于為福星嶠南之士祀瀛溪于精舍
以仁賢不以材健也爾其勉旃可

楊瑱寶章閣依舊游西提舉

朕以元日詔部刺史舉澄按之職法饗殘之吏爾適

秦使畿內造庭稱觴朕惟舊學之美子公府之賢掾
深欲引以自近念爾方褰帷問俗為天下郡國之倡
姑命寓直延閣以沆外庸可

賈明道都大坑治

自此以下再
兼校垣所作

昔大防純仁光輔元祐大忠純禮皆列外服豈以兄
弟之當國而廢朝廷之擢才哉爾以高才妙質久於
郎潛縈遷卿少出為牧守資歷深矣及丞相歸袞未
之甄拔非抑同產也示天下大公也朕以銘臺命爾
起家非私丞相也監我家成憲也矧丞相嘗涖是官
士民至今丞嘗之導其成規廣其遺意大小馮君之

歌不得專美于前矣可

趙崇熈吏部侍郎兼檢正

朕躬攬權綱首嚴銓綜群趨左選誰為寒畯之階梯
妙選端人俾掌天官之衡尺輿情允愜素望久孚具
官某凜凜百鍊之剛挺挺千尋之直剴裁甚敏聳觀
郢匠之斤揮發摘如神靡事漢臣之鈎距畫笏而計
省之職舉涉筆而中書之務清遷選授之名司峻論
思之真拜厥今士難得闕吏或舞文彼車載斗量皆
望山公之啓擬此鏡明水止專待行儉之公平簪橐
之聯有光履屐之間咸當噫古人設小宰之職權重

于列曹先賢謂同姓之卿心存於宗國益殫忠盡庸
副簡求可

孫附鳳右諫議大夫兼侍讀

有猷告后每陳忠臣五義之言以諫名官遂冠天子
七人之列出於親擢孰不聳聞具官某塞直剛大子
兩間達智仁勇之三者自更大化徧歷緊官見無禮
於君真有如鷹鷂逐鳥雀之志距邪說害政不下驅
虎豹放龍蛇之功凡冰山倚勢之人若金谷望塵之
友拜彈畧盡窟穴一空既振職于柏臺直登賢于蒲
省汲黯入禁闥可寢淮南之謀陽城伏延英不待昌

黎之論匪曰序遷之典故茲為柄用之權輿噫荷良臣美名卿有魏鄭公之素願事聖君無諫朕疑荀卿子之失言其益進於忠規以欽承于眷獎可

范純父殿中侍御史

續諫垣之集霜簡盛傳提憲府之綱風稜采峻宜加顯擢以示至公具官某中有操存外無附麗卿取諸世者庶矣朕選于衆而得之頃列駕行晉義勇角字字中愴人之肺腑言言切時政之膏肓艾夷本根銅山之賊掃迹推求甲乙金谷之友散群論賑荒如拯溺救焚請去貪必明目張膽迺錄七爭晉二一臺昔